

佛說懈怠耕者經

宋居士祖梁京聲譯

聞如是一時佛在羅閱祇竹園中與大比丘
衆千二百五十人及衆菩薩俱時佛從羅閱
祇欲詣舍衛諸菩薩導前釋梵被服又見身
體如四天王諸比丘僧悉從佛後諸天龍神
在上供養去城不遠時有一人在田耕種遙
見如來弟子侍從端正殊好威神巍巍容貌
殊好如星中月奇相衆好金光從容三十二
相皆出衆好遙見世尊心便歡欣欲往詣佛

稽首作禮資受法誼佛世難值時時一現退
自念言耕地未竟下種未畢須後閑時乃當
見佛時佛知心發此懈怠世尊便笑五色光
光從口出照十方境界安隱五道皆乘光來
集會佛所地獄休息餓鬼飽滿畜生思善人
民求度諸天龍神來聽道法賢者阿難解了
七應誼法時節身與他人即詣佛所長跪叉
手白佛言何因笑既笑會當有意佛告阿難
汝見犁者不對曰已見佛言是人從維衛佛
已來九十一劫於是耕種每一見佛常自懈

怠選軟復後忽忽耕種生死罪法不識法犁
種無極田已過六佛不得蒙度於今見我適
發好心即便變悔欲故懈怠樂種罪根時人
遙聞棄耕及田來詣佛所稽首佛足悔過自
貢愚癡無知罪過甚重願見愍傷原其罪過
蒙冥抵突懈怠來久惟見原恕濟脫生死佛
言善哉卿能覺者於法有益終不為損佛為
說經示懈怠之垢精進之利踊躍歡喜立不
退轉諸天龍神無央數千皆發無上心正真
道意以故學道常當精進莫為懈怠宛轉生

死佛說如是賢者阿難諸天龍神阿須倫聞
經歡喜作禮而退

佛說懈怠耕者經

佛說辯意長者子所問經

元魏沙門釋法場譯

聞如是一時佛在舍衛國祇樹給孤獨園與
千二百五十沙門俱菩薩萬人爾時世尊與
無央數大眾共會圍遶說法時舍衛城中有